

六世祖葵蔚公詩稿鈔版久經遺亡印刷本  
亦罕有存者余於廢書中搜得之讀古白先生  
序後之人宜亦所珍惜也

嘉慶十三年九月廿七日



蔚菴逸草序

友弟陳元素古白

元素所萃同氣類能深心制科  
言取高第而餘才為古文詩人  
方許以無朽而天敘之速者則  
有癸丑之俞君宣丙辰之彭原

樂云。君宣第後。仕為令。四年不  
祿。但已甚。而原樂第纔兩月。當  
官行人。未及受。而卒於邸。尤楚  
毒云。然原樂舉庚子。視君宣已  
酉。先辭措大。且署校。朱方三年。  
寸名赫然不減令也。其年又視  
君宣三四年長。君宣又似不及原  
樂矣。雖然。此亦後死者痛悼  
兩君子而無慘焉。忽並傷之。忽  
並慰之云爾。君宣有自娛集。二  
十年來。手自刪定。且自品題。自  
歌自舞。整然成帙。其子臣度於

苦塊中錄梓行海內。而原樂生  
平詩文甚多。皆咄嗟立辦。不  
留藁。德先弟第訪搜購。尋  
寫胸腹之所記憶。備諸勞苦。越  
三年。始獲什之一。題曰蔚菴逸  
草。蔚菴。原樂自號也。梓成。屬  
元素叙之。自娛之梓。臣度亦請叙。  
久矣。慘焉不能下筆。今讀茲  
草。雙淚交落。叙曰。天乎。胡然而  
才之。而顯之。又胡然而敘之。則嘗  
憶君宣之言。死不足畏也。吾以  
夢試之。神之遺形。其境奇樂。

悼友之詩曰。相知地。不在人間半。生  
死於今平。等看。豈不去來游  
戲。權視幽明哉。聞原樂邱中  
祢留時。意色轉夷。不戀不怖。  
兩君子者。其皆以慧業現身。  
伯念稍酬。後即厭世。俗不察。  
相與吾之。更為比絮。短長樂苦  
徒令白玉樓中。啞然失咲。然而  
原樂之才。經世才也。才難。不痛  
原樂。不為失原樂者。痛乎。原  
樂詩。格高而思奇。軒然朗。  
然如其人。書法在清。臣誠懸

之間。三令子既梓行其詩。復檢遺墨。石之以傳。煥多神明。原樂不死也。

萬曆己未臘月八日



蔚菴逸草

古吳彭汝諧原樂父著

遊桃源澗

碧澗山隈轉鳴泉樹杪懸桑麻綠屋宇  
雞犬隔人煙客避中峰雨僧安一宿禪  
桃花今又放相問世何年

其二

列坐流泉處開襟絕點塵品茶旋汲水



問世却迷津  
龐吠迎新客  
人稀狎野賓  
翻疑盛明際  
還有避秦人

天潭谷

山色輕浮黛  
城陰淺度沙  
林深晝欲暝  
簪盍綺成霞  
入谷雲生屐  
憑欄水濺花  
寧知暑方劇  
有待晚逾嘉

其二

徑轉烟霞僻  
探竒此得過  
覺來天地闊  
望入海雲多  
沉碧裊衣袂  
空清侵薜蘿  
還持無限興  
去此欲如何

郊行

三春花發山容丹  
四月濃綠猶堪觀  
何事閑拋同劍映  
猛然回思嗟指彈  
長條抓衣風葉落  
枯枿當叩露磴寒  
深密縈紆忘暑氣  
劃開青削芙蓉攢

題畫菜

幽居謝塵鞅清宴欣自適有客款荆扉  
園蔬聊可摘行雲停不飛山光翠欲滴  
情忘興轉奇縱飲浮大白此中有真味  
無以供熱客

曉渡京口

風梳剛樹好江水恰來潮滴翠搖文筆  
流光曳碧綃高吟愜幽興遠唱辨村謠  
指點停橈處瓜洲去不遙

其二

促坐同仙侶橫江共一船盱衡彈劒缺  
轉瞬挹金焦真至無拘束名通破寂寥  
悠然臻彼岼飛渡自今朝

邵伯湖

彌望水平阡鷗鳧狎去船晴烘千樹色  
縷起幾村烟皮酒初開釀河魚不論錢  
沿堤聊散步煖氣得春先

平輿見和京口曉渡詩再次奉答  
聲囂知近渡岼闊覺添潮攬鏡愁看鬢  
披裘怯似綃難賡推險韻到處起新謠  
何事鄉心切離鄉亦未遙

高郵夜泊次韻

方舟浹晨夕樽酒共更殘揮塵玄珠落  
開襟宇宙寬燈懸帆影曙月拂劒光寒  
期爾春風裏花林竝馬看

黃河曉發

頻聞夾棹動吳歌殘夜微霜起渡河漫  
對黃流嗟逝迅定誰青眼惜蹉跎春臨  
臘月冰先泮暖入平林鳥亦和爲道行  
人最安穩風烟澹澹水平波

不寐

中宵清不寐客思黯然飛囊穎何當脫  
關頭是覺非風波行處有鴻鴈爾何稀



呼童戒前路晨起慎霜威

旅泊

淺沙膠去棹抵泊近更殘野火連天燒  
風濤徹夜寒方言久能辨春夢覺猶驚  
何事催頻起舟行上溜難

戲答平輿

桃源問津須及時管領春風去未遲何  
事劉郎偏縱棹驚濤拍岸水流漸

其二

殷勤勸我着鞭先爲遣前驅向柳泉山  
吐月光迎騎穩無眠旅館使人憐

露酒

露酒香浮吸月華傾來疑試雨前茶若  
教致我三千斛不負春堤十里花

東平道中

停驂頻問訊屈指到京期野曠啼無鳥

山空伏有龜騰驤看賞駿定鐸厭行疲  
是處貞珉在何人計口碑

途中冒雪

北風一夜雪峻嶒望望郊原改舊稜砌  
就玉階迎曉騎陡翻瓊屑羃行簷林開  
庾嶺枝枝玉路擁藍關片片冰遙想帝  
城雙闕裏人間瑤島快先登

阜城縣

日光澹灑灑雪意未經消草色全含潤  
林香欲待招編荆成小築帖石宛通橋  
怪道風偏煖春來祇隔朝

旅邸無聊喜諸年丈過訪

春光荏苒不堪邀晝掩荆扉對寂寥忽  
訝故人重命駕猶然青眼慰飄蕭支離  
病骨元非傲牢落長歌總未調每欲乘  
流聊試棹風波江上可通潮

琵琶

浪把鯤絃馬上翻漢宮人遠嫁烏孫可  
憐紅粉千行淚贏得將軍戰血痕

箏

十三絃柱促秦聲綺閣春晴破曉鶯莫  
說貫珠傾玉筍空山泉響亦關情

笙

瑤臺風月倍清嘉鳳噦顫顫吸露華恨  
殺曲終人不見綵鸞何處是仙家

笛

昭華玉瑄玉纖宜樂部新推女教師自  
是相逢腸欲斷那堪三弄月明時

八月十七夜

何事中秋月冥冥暫却過郵亭方扃  
高館復張羅南酒過淮少西風欹枕多  
長吁頻視夜牢落不成歌

南沙河白鵝

誰家白鴈遍平皋  
碧草青莎藉羽毛  
不是山陰狂道士  
更誰籠取待揮毫

肥城縣

迢遞空山裏  
紛紛落晝陰  
薜蘿含霧遠  
楸檟拂雲深  
石潤粼粼出  
沙寒細細沉  
湍溪未可渡  
宛轉別開林

逆旅次壁間韻

千里迢遙復此遊  
西風颯颯舊征裘  
天空雲幻看如狗  
水闊崖閑不辨牛  
事業自甘磨鐵硯  
姓名能望覆金甌  
羨他浴露眠沙鳥  
鎮日悠悠白荻洲

長清縣

晨星猶歷歷  
山色遠蒼蒼  
紅潤林楓老  
黃來野菊香  
危崖持馬滑  
幽壑動衣涼  
漸覺行人穩  
前途已就康

野宿

平沙逐逐騎郎當  
迢遞層雲起大荒  
宿莽牽犁紛小豎  
新疇拾卉間紅粧  
倦飛木葉秋看老  
罷浴鳧雛日已黃  
茗椀自堪供嘯咏  
窮鄉那可覓桑郎

旅次

曲折穿林小徑幽  
淙淙碧澗水交流  
征衣八月驚寒早  
村鼓三更和雨收  
旅客家鄉渾是夢  
野人籬落自宜秋  
無端又向燕山道  
滿眼靡蕪不自由

黃縣

二月行將暮  
柳條猶未青  
人烟依北渚  
山勢入東溟  
市井浮蜃氣  
盤餐雜海腥  
惟餘風太朴  
茅屋不須扃

旅邸兀坐風雨無聊  
誦先伯隆池用潘邠老句四篇率爾賦懷以破

岑寂

滿城風雨近重陽寒綠深深舊草堂夢  
去江南人不到狂來燕北酒新嘗持螯  
霜後看皆紫把菊街頭半是黃對景忍  
教吹帽落蓬絲遮莫似潘郎

其二

滿城風雨近重陽信宿浮蹤寄此堂湖  
海襟期誰與共風塵味況備今嘗宮槐  
霧入仍殘綠御柳秋深欲褪黃翹望鴈  
飛應不遠萬回空自憶仙郎

其三

滿城風雨近重陽且喜塵囂不上堂據  
稿抽毫耽宿好籠紗瀹茗自經營山從  
北極看來紫菊爲今朝滿意黃惆悵仙  
源迷去路漫將綸棹學漁郎

其四

滿城風雨近重陽  
槐柳森森自繞堂  
深巷秋砧偏到曉  
故園香稻定應嘗  
御溝流晚澄澄碧  
珍果含甘顆顆黃  
潦倒風塵羞屈首  
彈冠祇恐負王郎

有感

飛鳥無寧翼  
卑枝豈近名  
囊琴憐隻撫  
匣劍不成鳴  
且自隨人面  
何堪問宦情  
所親來慰者  
落魄愧平生

邸中顧道源見過

問世巍何甚  
生涯吾道難  
自捫還守拙  
天與不更端  
交久情偏至  
形忘飲自寬  
眼前仍有誤  
何必盡儒冠

臘月朔

月朔垂今盡  
驅馳齊魯間  
山深深不了  
溪轉轉逾環  
草領霜全白  
年催鬢欲斑  
飄蕭有如此  
歌罷淚俱潛

登報國寺毘羅閣

寶閣蒼茫入太清琉璃千仞駕空明蓬  
萊王氣生浮動鷲嶺奇峰近削成擘手  
摘星雙檻外舉杯邀月八窗平分明便  
是真如境莫道如來是幻生

有窰變  
觀音

宿高皇廟

當年漢主有高臺擊筑歌風亦壯哉夜  
靜鐘殘僧定後月明林曙鳥飛來空留  
雲氣歸芒碭時有耕犁治草萊英爽如  
存思沛否遺言千載使人哀

過高郵湖

落日下平湖風烟澹錦鋪護堤盤木迥  
窺槩水禽呼排蕩真空闊流光乍有無  
漁人遞燈火一扣酒家胡

和象江兄虎丘寺

寶地梯雲得清華滅世埃石猶言下悟



景逐望中開  
鐘梵穿林出  
笙歌入夜來  
灑然心有會  
南郭未應灰

其二

海湧峰頭翠欲流  
空中樓閣見丹丘  
月開皓彩蒼崖曙  
雨度涼颺碧樹秋  
引酌品泉神倍爽  
摩娑悟石思通幽  
鳴聲下上聞三籟  
百遍登臨興轉悠

月夜

涼月清輝滿畫闌  
青蛾歌徹玉簫寒  
行雲怪底浮空住  
咲拍香肩指點看

題畫鵠鵒

司空座語效寒皋  
誰啓樊籠爲解縲  
未投秘監銜魚袋  
且浴清溪愛羽毛

爲僧題畫菊

茅齋閒寂畫常關  
宴坐焚香斷世緣  
搖落秋風幾叢菊  
携來禪榻對清閒

題畫扇

移根自檀欒擷芳遡彭澤不避雪霜侵  
貞心結泉石

夏日偕俞容自年丈坐劔池綠陰  
十章夏木晝陰陰曲覆渟泓碧澗深泉  
響輓轡聲不斷雨侵苔蘚綠逾沈座中  
玄屑霏談塵空外梅檀起梵音縱酒高  
歌興無極且教明月透高林

春夜

春宵飛雪怯衣單坐隱虛窻落子寒試  
問朝來梅信息可能增却幾分寬

落花

風雨蕭疎入夜頻朝來花逕沐初新飄  
歸碧澗流脂冷飛入蒼苔點繡勻稚子  
嬌眠誇剩錦佳人行笑拾餘春閒看幾  
陣悠颺處多少繁紅砌作鱗

秋夜

秋氣入林薄蟲吟滿四鄰閒情詩卷密  
獨酌簡編親搖落悲初動鏗錚賦又新  
攬衣步屐于譙鼓爾何頻

秋夜同社中兄弟携妓步月

蓐收吐商氣蒸燠條蕭散銀蟾漾明河  
清輝耀亭館公子敬愛客披襟洽忱款  
雨到凌寒竹三益昂霄伴金壺引月長

玉袖飄風緩法曲迦陵音新聲嶰谷管  
仙仙紫氣來灼灼芙蓉滿迢迢清夜徂  
湛湛巖更短主人未言央客子不暇懶  
願言須及時造物日媵抔

秋閨

撫景無端恨落花豈無容色燦朝霞蹉  
跎一夜秋風起遙憶春光歲月遐

其二

樓頭昨夜鴈聲哀  
手把吳綾漫剪裁  
寬窄別來渾未定  
小鬟調巧教儂猜

其三

睡起熏爐燼篆烟  
滿懷幽恨在花前  
空憐底事青春老  
羞殺庭前老少年

其四

紛紛涼月遍亭臺  
一派笙歌別院來  
此夜蘭房燈是伴  
金尊教妾爲誰開

其五

無那懷人不自聊  
芙蓉挾雨可憐嬌  
沈腰不是偏多病  
一種相思暗裏銷

天平山中

秋色深山裏  
蒼黃錦繡文  
寒花爭映日  
野竹暗穿雲  
石就空中起  
泉隨到處聞  
何能卜居里  
此景欲平分

秋夜

新秋薦爽襲衣涼一派秋聲入夜長樹  
古月明翻老鶻苔荒露冷泣寒螿交情  
谷口元相得知已龍泉好自傷不信星  
槎能傍斗支機携出五雲鄉

贈陸鍾符父母

三年花縣美陽春一劔橫空士氣伸不  
有平原標勁節孰從塗炭正冠紳甘棠  
處處懷歌召萇楚天天願借恂分陝重  
臨應不遠還期愷澤庇吾民

題虎溪三笑圖

曳杖山中看白雲清溪分手夕陽曛舒  
嘯劃然天地闊不知何處應山君

采菊東籬傲陶體

朝來饒爽氣籬菊已含金采采不盈把  
悠然愜素心携酒倚南窻引觴頻孤斟  
長風起天末鏗錚鳴我琴無爲櫻志意

抱膝以長吟

其二

行吟東籬下黃菊競芬芳  
三徑有榮觀歸鴻迎我翔  
南山多白雲颯颯來清涼  
稚子欣進辭秫稻正穰穰  
緬懷寄酒泉聊可與徜徉

題紅拂

夜嚴刁斗靜無譁漫把紅妝換幘紗  
應是司空憐女俠開籠縱得到人家

悼亡

合卺經今二八年忽驚幽夢絕冰絃  
供甘有爾親能豫雜佩無人予自憐  
針紉餘茶傳女教篝燈遺跡課兒編  
深衷每厪春冰慮不聽蠅聲倍愴然

題畫梅

玉蘂香浮月滿庭雙棲鷓鴣夢初醒  
相

思欲寄天邊信玉笛飛聲不忍聽

題芭蕉紫薇

綠陰新展小窻紗池裏繁紅鏡裏花靜  
對澹然無俗慮碧天無際燦明霞

題菖蒲

秦王空覓長生藥漢主虛傳好道名自  
是靈丹不輕錫好將泉石共餘清

撫景

撫景春猶在開襟日正長鳥生林木韻  
花寫研屏香石液供新茗溪鮮足晚梁  
爲言風色好指點看垂楊

偶成

風雨閑中適煩囂靜裏銷紅殘花滿地  
綠漲水平橋魚戲萍開合簾移月動搖  
行吟無一事樗散足逍遙

天池道中有感

鐘鼎勳名亦可銷還從磨勒認前朝巖  
岨今此開生面碑碣仍教覆艾蕭捷徑  
縱橫趨野鹿空華的爍舞山魃名山自  
是來天地徙倚松根問老樵

宿靈巖寺

桂子清秋興不賒儘將醉處作吾家花  
宮仙梵三更早竹榻筐牀十倍嘉蘿草  
紛紛虛映月松風肅肅漫煎茶上足乞  
靈畱姓字愧無佳什贈瑤華

從鄧尉山中還至虎山橋坐月

林光漠漠烟勻齊花氣霏霏醉欲迷款  
乃湖中小舟小蒼黃日下西山西寒鴉  
飛盡渚涯闊白苧歌殘月影低露冷霑  
衣萬籟靜伊啞村落催晨雞

八月十四夜無月

南樓孤客興惝漾共吟愁疎雨挑燈夕



淒風落葉秋傳杯綠蟻動度曲紫雲酬  
對此情無極清居亦勝遊

虎丘待月歸途卽事

銀蟾澹澹漾平川前路笙歌簇畫船夜  
半渡頭人笑語當壚少婦酒如泉

秋望

平疇迷野葛蕭索不勝秋皓月千家淚  
悲風百結裘生涯吾用拙人世自浮漚  
漁父如相識長歌任釣鉤

德清有餘不溪兩山對峙一水中

分城堞洪洞臨踞上下渟泓沈碧

無間四時而出城以外則相傳爲

孔愉放龜處適熊青嶼年兄泄茲

邑余造訪焉聊卽見聞成八絕句

千山會出駛流深過雨風濤黯欲侵打

得逆魚浴路賣

雨後逆水而上者俗呼逆魚

城邊罾

網密如林

其二

前山山映後山明  
溪水中流徹底清  
夜坐船頭迎月上  
曉推篷底看雲生

其三

蜿蜒松篁碧似雲  
弄香好鳥隔溪聞  
清泉印徹初絃月  
濺起飛花潤宿醺

其四

百尺長虹綠映人  
雲飛小艇往來輕  
采桑清曉紅裙溼  
市繭黃昏雪浪行

其五

桑洲勻淨綠初微  
縮項溪邊上正肥  
日暮樽歌人笑語  
斤頭携得滿瓶歸

其六

散髮雲龍瞰碧漪  
風吹紋縠媚朝曦  
脚魚魚出酸醃白頭繭  
繅來倭墮低

其七

餘不古廟肅陰陰斷碣荒階綠蘚沈只  
有門前溪水在空心流得到于今

其八

陰森古檜密雲屯吼起風雷十里聞祇  
恐夜深飛蛻去推窻蒼靄落紛紛

秋日過尹山莊

秋日放船好霜楓兩岸林鷗馴窺槩近

魚樂棹波深月桂迴團扇風篁開素琴  
茫茫千里思對此獨關心

七夕立秋與平輿坐竹堂寺樹下

懷君理

梧葉墜新秋烟籠竹樹幽瞻言人北去  
彈指火西流依約翔烏鵲希微度女牛  
移尊邀月久促織曳聲稠

涿鹿行

去年上涿鹿地白風寒輕馬足今年下  
涿鹿日煖風和車折軸生憎往來何太  
頻六千道里空逐逐滹沱日夜西北流  
嗚咽泉鳴聲噴玉西山一帶畫屏開不  
見長安虛極目何如道傍楊柳枝一度  
春來一回綠

### 界河驛

渡河三日過滕陽取次停驂古驛傍一  
水中流分地界幾人萍聚自家鄉窺簾  
月色催殘漏到枕鐘聲促曉裝何事紅  
塵耽世態紛紛爭逐馬蹄忙

### 嶧陽道中戲柬平輿

搖搖鈴鐸不堪聞策蹇衝寒日已曛拂  
劍振衣蘇坐好新醅魯酒足微醺

### 其二

征鞍滾滾逐香塵似御輕風似躡雲莫

道旅懷偏寂寞當壚十五茜紅裙

衝風

刮地北風號堅冰蠹鬚毛攬裘渾似鐵  
着面利如刀却訝煨寒火還驚吼怒濤  
但須能得醉那定是香醪

雪後過東阿道中同平與太玉諸

兄

登登行不盡逐逐又經過陵谷猶遷改  
風塵其奈何含春高樹色融雪斷橋波  
馬首何當問壚頭足笑歌

其二

白白渺無際占林鳥亦迷玉溜啼紅檻  
銀章散碧蹄烟拖寒店遠雲壓亂山低  
指日長安道春風杏子蹊

其三

青陽初曙雪入望轉離迷乾坤新局陣

身世任筌蹄攬翠高暉朗聽漸下瀨低  
任教行歷是不必做前蹊

其四

相携聊散步振袂似凌風孤嶂平沙外  
危橋斷雪中青萍看劍在白壁幸君同  
何事遠行役天涯一送窮

其五

策蹇衝寒影晴光帶雪開寒林催客去  
饑鳥逐人來村臘仍封酒新香早報梅  
相呼一笑樂前路聽春雷

陳古白惠松蘿茶

松蘿分遺已旬日汲得惠泉方發封竹  
爐火活自按候色味香來殊不同上界  
真人厭雲液荒齋棊几餘清風枯腸頓  
使回生意灑滌應知符化功

虎丘翠筠堂雨晴啜茗

綠雲羃歷曲蹊平  
滴翠晴光染袂輕  
正好三春初試屐  
那堪百卉具飛英  
流泉暗落當軒竹  
清楚微聞過嶺鶯  
小摘新芽敲活火  
僧雛閣底試旗槍

贈葑溪俠友

葑水流清駛英風  
蕩奇姿苕穎噴芳薌  
腰佩折瓊枝  
慙高軒過挽袂  
爭相知  
豈不艷薜榮  
高義青雲披  
千金顧不重  
一諾詎能移  
盱衡解紛難  
揮手謝宴私  
且看韜若谷  
何必庾如坻  
清音落檀板  
美酒傾花瓷  
安和順時命  
榮澤俟岐嶷  
從此觴百年  
無煩餐紫芝

夏日過塘浦

澹雲穿日脚  
短棹激流光  
竹粉看成綠  
荷風欲送香  
村歌娛刈麥  
野饁遺針秧  
蕭散真吾好  
從教醒亦狂

竹堂寺懷古

弘老當年啓梵宗，千梅萬竹翠雲封。  
根株淨洗難棲鳳，骨幹盤紆有蟄龍。  
潦倒尊前無限酒，依稀月下數聲鐘。  
徘徊清宴渾忘暑，分手溪橋露已濃。

周以寧招飲雨中入東禪卽事分  
得秋琴二字

古寺人稀迹，淒清絕勝秋。  
竹風時掃榻，杉月夜侵篝。  
梵起雲中磬，歌殘樹杪樓。  
相携共延賞，無住任樛流。

其二

雨聲連昨夜，涼氣入高秋。  
荷潤香浮席，棊敲韻動篝。  
談玄無色界，抉密破烟樓。  
獨有來人思，脩脩接勝流。

其三

城隈空翠溼，剝古歲華侵。  
樹老支頤石，



松吟不鼓琴拋書榻胡蝶匝葉穩棲禽  
相對忘拘束悠然縱酒深

其四

移棹翻樽劇浮烟夾岬侵却投形外契  
似和風中琴笑笑無三窟于于習五禽  
還疑更漏促戀賞未言深

孔雀

翠錦繽紛異越禽晨曦遙映碎拖金應  
知文彩須呈瑞肯向叢篁晦處深

鶴

由來胎化駕仙儔夜半橫空客倚樓清  
唳一聲千里月泠泠松露下高秋

鸚鵡

花明春檻暫開籠念得宮詞小閣中何  
處雪衣能巧慧傳將綺語到江東

鵲

春來鼓橐扇陽和好鳥歡迎亦和歌應  
有故人天上至開樽掀笑夜吟多

燕

香泥溼溼落花春總入雕梁盼壘新只  
有紅絲曾繫足慇懃還向舊時人

鴈

青海望穿雲外信金閨夢斷客邊秋  
茫千里關情處遍繞平沙白荻洲

鷓鴣

細雨晝昏黃竹裏輕烟曉颺石楠西數  
聲啼破鄉心切若个行人不慘悽

鷓鴣

晚啄雞羣香稻細露眠鷗伴墜蓮紅莫  
道鮮明來衆忌花翎不惜滓泥叢

鱸魚

楓落吳淞水漾緋四腮新出釣魚磯至

今風味猶堪憶不道遊踪忘却歸

蟬

沿堤疎柳颺新晴斷續高吟徹耳清獨  
有征人數行淚秋風吹落夕陽聲

海虞道中

山雨看逾碧孤帆颺日斜水寬開浴鳥  
香暗遠飛花膏潤占風土繽紛贍物華  
清秋望不極餘思動蒹葭

其二

襲袂涼颺動悠然澹盪遊溪雲飄迴墅  
山雨入高樓竹下披襟適磯頭把釣幽  
何時遂孤興相對共淹留

桃源澗同王心禹徐氏昆仲

蕭散從吾好清真幸爾同閒庭松子落  
幽館竹根通致爽泉流澈狂來酒莫空  
還教明月上散髮到城東

其二

玄賞耽成性相畱與未涯  
沿流擊蕙草尋徑問桃花  
山吐初弦月林含欲暮霞  
忘歸仍下榻神境已俱遐

送友人秋試

才名蚤已擅江東正爾初乘破浪風  
萬里濤飛揚子渡千枝桂馥廣寒宮  
葩流江筆驚人句賦擬湘靈點化工  
知是扶搖天咫尺高騰五采氣如虹

和越谿牛女年年渡何曾風浪生  
之作

銀河清淺橫鵲駕報雙成  
昵愛經年結歡娛一夜傾  
金波流皓彩碧落步虛聲  
最是牽情處晨曦欲漸生

其二

靈匠憐今聚風光倍有情  
殷勤舊時意

相向渡頭迎書斷天涯影砧殘月一聲  
何如永今夕猶得話平生

杏花

春風二月鬪英姿策馬相探宥去遲紅  
錦裁雲花爛熳香堤十里醉歸時

牡丹

名花絕代紫和黃冶艷臨風百寶粧一  
見君王承寵後霞衣不是世間香

桂花

秋到嶺巖金撲堆獨憐風露老奇才小  
山唱後清香發惆悵王孫來未來

夾竹桃

絳綃剛染曙光稀舞袖新翻翠縷依莫  
道春風人面改清標還暎月明歸

竹

歲蕤翠葆斬新齊勁節脩脩遲鳳栖風

灑清音交榻永月籠寒影伴琴携

草

春風匝地綠雲柔望望平原野色幽忽  
見飛來雙翠羽無端引起去年愁

荔枝

瓊肌鮮映絳紗裳玉腕擎來滴露香底  
事文園多病渴名姝含笑進君傍

再賡前韻簡越谿

風浪驚時眼秋宵不宥明獨憐雲漢影  
嘗伴月華清杼藻空分野披襟入化城  
盡除愁種子無復逐年生

其二

幸值良宵永星河分外明怪來空世想  
對此絕塵清籟起聞天闕光流動赤城  
還期共玄宴芳馥桂枝生

和蔣公鳴贈魏玄

何來溫柔姿妙絕  
寰瀛選春花旣堪羅  
秋水仍宜翦不道  
可憐嬌應愁含睇淺  
寄語似東風好護紅香軟

其二

紅香一何瑩雙鬟  
一何綠清音發皓齒  
宛轉霓裳曲儘教  
金壺乾共訝嚴更促  
紗窓雪霰飛點點  
輕盈玉

雪禱曉起

析聲剝剝催衙急  
笑殺廣文亦自勞  
門倚孤桐風淅淅  
草深幽徑犬牢牢  
江心水好學抱甕  
市口酒雜難舖糟  
安得黃筌龍掛幅  
颯然傾瀉無屯膏

李復吾侍御桃源莊賦贈二首

山蹊深突碧雲連  
恍入桃源小洞天  
高閣浮空來爽氣  
虛梁斜度掛飛泉  
幽奇自合容蘇嘯  
靈擘能無學米顛  
如此名

區容易到逍遙獨有地行仙

其二

柱史藏名鬢未皤  
耽幽層構碧山阿  
平分秋色芙蓉逕  
管領春風楊柳坡  
細酌雲根浮玉液  
高談雪檻出金梭  
優游娛晚公間事  
望斷蒼生可若何

和陸起頑毘陵道中之作

春風初試棹夾路  
薦新花山翠偏宜雨  
林紅儼覆霞  
轉枝迎氣鳥戲墨  
近塗鴉相對成  
玄賞清芬七椀茶

曉過玉山寺

疎星歷歷曙光稀  
一片江聲殷翠微  
曲磴迴飄松露溼  
孤亭遙駐海雲飛  
觀空漸覺諸緣澹  
坐隱閒銷百慮違  
猶喜風流渾不盡  
嘯歌終日自堪依

同王丹陽東里趙丹徒青巖霍金



壇鍾西金山晚眺

天高氣肅白蘋秋襟帶江山面面收登  
假上方餘爽籟沉浮大地總虛舟龍蛇  
勢入看逾得魚鳥相親意更悠放棹乘  
流行自在可堪潦倒廿年遊

題畫菜

青青園中蔬摘摘美可茹願言平生交  
相對絕綺語

題骷髏圖

皮肉云何披披盡見真髓居然南面王  
寧以此易彼

秋暮同何騰虛訪九里庄

蕭蕭木落逕迴斜探得幽奇便似家坐  
愛長松傳法吹閑看懸薜逗飛霞雲晴  
過塢輕浮黛藻軟彌塘淺護紗最是相  
逢能嘯傲沿流散步問黃花

其二

穿林刺促亂鈎衣鳥語喧然客到稀深  
護溪流滋竹圃散堆湖石隱荆扉簷花  
索笑堪浮白野饁生香近採薇徒倚高  
樓共抒思可將醪酎送斜暉

蛺蝶花

舞盡紅英不肯歸託身香徑傍苔衣夢  
中栩栩分明見花底翩翩未可疑

其二

金碧飄歸花徑草粉香輕褪畫欄沙小  
鬟欲待揮紈扇冉冉雙眉幻作花

其三

秋臨庭院遍秋輝撲地爛斑綵色肥應  
有香魂迷宿夢風流猶逐野花飛

赴約焦山郊行卽事

迢遙林樹鬱蒼黃籬落蕭然似怯霜漸

起村春茆屋煖微醺秋酒菊根香避風  
舞葉隨行慢颺日孤帆信野航雅結幽  
期酬未得相携此日試徜徉

象山普賢洞

懸崖小架俯江臯帖石衝波勢未牢清  
梵隔江浮玉磬仙音排浪出金螯霜臨  
紅葉千林曙雲斂晴空萬里高獨倚危  
欄一舒眺夷猶應復愧漁舸

中秋獨坐

良夜正三五閒聽長短更對形恰有酒  
入戶何多聲人籟風中斷天香坐處清  
興來歌自發直欲覓寰瀛

和康念東郡侯金山寺作

寺下江深清不淺蛟龍靈窟此中收飄  
飄鐘磬香臺午歷歷峰巒寶閣秋劇興  
幾人能絕頂畱題誰是最高頭攬袂把

酒醕江月映徹清光蘆荻洲

其二

偶邀風日一乘流瞬息登顛大界收山  
正蒼然看不了林含紅矣盡知秋雲帆  
片片歸京口雪浪層層下石頭滿眼風  
波江上客幾時偃仰問滄洲

其三

砥柱東南萬里流滔滔不盡望中收魚  
龍潛躍波濤冷鴻鴈翻飛蘆葦秋敢定  
浮踪雲漢外且畱名姓妙高頭須知滄  
海橫流處不礙蟾光遍遠洲

題吹笙美人

花底竝吹笙拂拭光零亂祗恐花睡來  
嚶嚶故相喚

題雀梅扇

有鳥花間鳴翩翩鶯其領占得最高枝

清芬絕疎影

和高太史啓梅花詩九首

了無花事上庭臺獨有孤芳映雪栽  
茶熟正思人恰到窻虛初訝鶴歸來  
清風共語當軒竹疎雨還愁點砌苔  
猶喜春風吹欲遍南枝開竝北枝開

其二

清芬疑佛又疑仙締結幽盟分外緣  
乾鵲數聲初曙雪明蟾十里不籠烟  
枝枝玉糝臨流亞襲襲香回薄暝前  
紙帳匡牀清夢穩渾然身入藥珠天

其三

春光無那逗枝頭黯淡香魂散未收  
入夢有情新點額懷人乘興雪盈舟  
擬將永月銷殘夜共掩黃昏伴旅愁  
正是關山未吹笛惠徼同調試春遊

其四

凍雨霏微搵淚痕  
弄晴初旭襯香溫  
空山茆店深深處  
流水溪橋遠遠村  
縱飲百迴須盡興  
巡簷一笑總消魂  
神人只合畱姑射  
月朗風清恰到門

其五

仙真高會廣寒宮  
淡淡香風信息通  
橫笛數聲關塞杳  
援琴三弄笑談空  
迷離洛浦人何處  
縹緲瑤臺月正中  
幸有廣平能賦客  
莫教閒寂在孤叢

其六

不隨紅艷鬪芳塵  
玉立清標世外人  
神醉羅浮湛秋水  
調賡郢曲盡陽春  
傳來驛使慇懃贈  
訪到孤山不孑頻  
最是月明過夜半  
香魂飄襲似真真

其七

松溪竹塢久相依肯負深盟歲月輝神  
女臨川珠有暈逋仙歸棹雪漫飛輕寒  
漸散香先覺疎影參橫烏亦稀不信花  
神太無緒闌干畱倚未應歸

其八

爲傳芳信到青陽雲水悠悠憶舊鄉漫  
道素娥通體玉爭如合德自然香避喧  
蜂蝶難相近結契松筠未盡荒聊寄一  
枝無限意孤貞曾歷九秋霜

其九

煖律初回知不知幽香恰露兩三枝吟  
殘東閣還相憶乞得揚州慰所思飄曳  
素羅殘雪後繽紛翠羽曉寒時蕭然相  
對成孤興取次難賡白雪詩

送王掄伯秋試

海寓文章屬仲宣英英鵲起振高躔三

台紫氣占奎夜六月長風迅翮天爛熳  
江花影綵筆新圓珠玉貫鴻篇明時正  
急收才彥莫把科名讓昔賢

送潘符仲秋試

彼美南徐彥鴻才譽早傳神凝秋水湛  
藻激錦雲騫幸際弘文日欣看入彀年  
雲霄今萬里花萼定雙妍得意秦淮月  
清光覺倍圓

七月十五夜

疎林通月白虛舍敞幽清昨夜剛流火  
新蛩已嬾聲荷翻珠露潤桂滿兔毫明  
坐久冥心境悠然愜吾生

無題

明月當空應有意芙蓉拂檻倍多情長  
似今宵花月夜紫簫吹和鳳皇鳴

其二



春風輕入翠幃開坐擁吳姬錦作堆已  
拚盡夜同歌嘯長短更聲任爾催

和館課夏伏雨涼

夏堂初過雨新爽似經秋鳥語輕風入  
蟬聲溽暑收開軒荷氣潤淨几墨花浮  
坐對斜陽暝疎螢點點流

其二

炎威方煽處涼雨恰來時靈籟鳴高樹  
紅粧亂綠池堂疑秋水浸菊借露花滋  
五憶歌堪詠煩歎總不知

玉蘭秋放

瑤花二月占風流底事花神爛未收應  
有玉人清徹骨高餐玉露又三秋

其二

廣庭秋卉葳蕤出雕檻瓊葩雅淡新不  
道花神能屬意先枝報與隔年春

其三

青帝行春去不歸洗妝姑射瑩輝輝玉  
顏偏映芙蓉色一笑臨風試舞衣

送友人吳覲墀之南都

蘭蕙中林譽江東復有卿秋冥橫萬里  
風翮快南征翰苑承先業蟾宮此盛名  
裁鴻看散綺吐鳳自驚人美爾前旌迅  
聯翩達帝京

擣衣

千家今夜擣秋聲擣盡清宵夢不成萬  
里征人龍塞月應無亦起故園情

煎茶

清陰可數晝生涼據稿孤吟興味長忽  
地松風添爽籟小鐺活火試旗槍

中秋

晴宵開萬里波玉瑩清光山吐容明辨

江澄練森落鵲躔無定樹蛩響竟空廊  
何處來芳馥庭前滿桂香

題蠶桑圖

柔桑采采不盈筐莫問雲鬟作麼妝一  
度一番新樣錦不知憔悴定誰忙

贈友

研書味道幾經年桃李春風景色鮮靜  
掩柴門無外事悠然悟得養生篇

過邗關

榜人眠浪穩一瞬到維揚紅袖窺簾密  
輕舸載酒香勞勞關吏檄促促客星裝  
澄水堪投茗推蓬試品嘗

澣墅別送行諸兄

金昆分袂暫亭臯颯颯西風拂旆旄長  
劔七星雲漢近片帆千里雪霜高樽前  
臭味芬蘭蒞鷁首逢迎總譽髦一路河

山開秀色緘題應寄慰牢騷

其二

行行携手上河橋極目長征日影搖不  
斷雲山初改色交加梅萼已封條愁聽  
雁唳心如結唱徹驪歌氣肯驕漫道風  
塵易離別榜人爲趁早來潮

和王澹寧閣中卽事之作

曉漏催頻集譽髦祥開五色瑞雲高齊  
瞻璧月懸虛鑑快領春風動綵旄濬巧  
已占文吐鳳新裁應製錦爲袍欣逢天  
網弘張日敢把絲綸學釣鰲

過雙溝贈劉文學敏行

憶昔斜陽策蹇來柴門臨水老翁開傾  
尊不惜供佳客握手相看詫異才座有  
羣龍來下食庭教獨鶴舞蒼苔祗今風  
景依稀在贏得文星映草萊

鄒縣逢驛使

逢君馬上去匆匆折取梅花付便鴻更  
有嶧山看不盡併將題寄數行中

荏平

行李繽紛塞路傍齋來猶說是輕裝更  
看馬頭塵滾滾隨風也上使君裳

贈寒山寺僧曉山

古寺塵囂絕入門凡慮屏松篁開法慧

雲石繼詩名現性傳龍樹降邪聽馬鳴  
禪心何處是江上曉山清

詠白燕

玉翦紛披縞素勻差池羽化影翻銀舞  
歸壁月溶溶夜睡穩梨花漠漠春素女  
遠隨天女至烏衣初換雪衣新舊時王  
謝休相訝濯魄冰壺已絕塵

其二

遍洗玄鉛粉乍勻翩翩光瑩色欺銀帶  
來梁苑初晴雪分得瓊樓欲曙春掠水  
不沾霜羽溼銜泥莫滓舞衣新冰肌自  
是非凡品未許昭陽望後塵

八月十三虎丘對月

冰輪光欲滿山屐快初征徑僻行人穩  
林開宿鳥驚翠睂新度曲雲鬢竝吹笙  
好共姮娥語連朝定許晴

十四夜泊虎丘雨不果上

不減南樓興輕舸載酒行雨露風磴滑  
雲共石梁平燈火船船伎天香處處縈  
相看竭浮蟻沉醉爲忘情

登靈巖山涵空閣

山閣岩堯聳碧穹茫蒼煙市有無中當  
軒巒色開新霽入檻湖光混太空環珮  
聲歸虛籟發綺羅香散野棠紅憑闌寓

目皆成趣何事冥搜說閩風

秋日埭溪舟中

西風瑟瑟鴈初飛小艇孤帆挂夕暉  
埭水涵虛成素練吳山凝翠敞重幃  
息機鷗鳥閒相對樂志縹緗興不違  
欸乃唱歌聲漸杳猶看暝色帶征衣

曉發黃埭蕩

曉渡雨空濛孤帆正御風春歸肥綠遍  
景暗曙煙籠水鳥悠悠起溪流曲曲通  
條然情境適合睇意無窮

初夏園林卽事

風雨三春過叢林柳耳添水寬魚在藻  
堂靜鳥窺簾野色供詩趣籬花襯酒帘  
憑欄無限意日影轉牙籤

夜宿句曲崇明寺睹李文定公畱

玉帶詩步韻贈寺僧碧崖本空

崎嶇遙聽隔林鐘  
夜扣禪扉得朗公  
却訝塵埃解相識  
題痕猶溼着紗籠

秦淮新柳

秦淮弱柳淡籠綃  
旖旎臨風意轉嬌  
時見當軒飛翠羽  
偏從隔水舞輕腰  
煙含一帶春愁盡  
雨結千絲舊恨遙  
試向章臺追往事  
未應攀折最長條

中秋阻雨戲咏

冥冥昨夜雨無奈  
度今宵烏鵲應愁溼  
芙蓉莫逞嬌挑燈  
知永夜酌酒怯輕綃  
寄語廣寒子撥雲  
須見招

雲間道中

薰風習習起銀塘  
曲折從流路渺茫  
幾處秧苗農務急  
一江荷芰客船香  
閒消清晝彈碁局  
暢咏新詞泛羽觴  
且對月明還信宿  
山陰逸興一何長



和館課初水芙蓉

虛堂閒永日綠水乍舒蓮  
茜錦新粧就明珠滴露圓  
含芳心獨苦不染意相憐  
共對渾忘暑香分几席前

其二

銀塘澄夕霽菡萏弄清新  
舞袖猶堪竝啼粧未許論  
菰蘆欣有託魚鳥自相親  
遙憶秋江上臨風懷遠人

其三

望舒分玉井散綺遍湖陰  
冰檻香風動珠簾爽氣深  
煙波開遠趣水月淨煩襟  
澹若華清想凝眸覺會心

其四

太液涵清泚紅粧錦作堆  
爭妍迴笑頰孤怨搵香腮  
繡帶風中舉芳心鎖未開  
若教能解語彷彿太真來

坐袁遜之栖鳳堂

宴處虛堂暑氣清  
脩桐高展綠雲平  
簟紋如水渾無事  
惟有楸枰落子聲

其二

枝上間關好鳥鳴  
湘簾高捲午風清  
試展黃庭摹舊榻  
漫呼毛穎語陶泓

其三

風味難忘想麴生  
仗些餘力破愁城  
寧

須縱飲方河朔  
但取隤然亦步兵

其四

忽聽黃鸝三兩聲  
雙柑斗酒賸郊行  
添來爽氣浮芸閣  
送去炎蒸別錦棚

其五

庭卉芬芳遍素馨  
競攢白玉綴鴉青  
寒簾惹動纖纖月  
祇恐光華隔畫屏

詠蘭

叢蘭生澗邊風來時自舞佳人步姍姍  
繽紛搖翠羽

青洋江頭對酒

偶爾對樽酒江頭共短亭汀蘆翻浪碧  
寺墻掛山青小語香浮席新腔妙入冥  
牽襟畱別處依約見殘星

題花林丹井贈日葵太醫

江南春半杏花香小構茅亭覆曲牆千

樹霞影今董奉九還丹熟古長桑晴軒  
綠遶流雲淨文檻吟餘遠岫蒼却羨無  
雙能世美葵心畱取待傾陽

携酒步月

冰天飛玉鏡皓彩似今無入戶千砧應  
橫空一鶴孤貫珠傾座沼立石儼聽徒  
興逸不知懶城頭啼燕烏

坐月中庭

璧月應難再今宵亦不遲綠堂寒桂影  
碧落澹星移川吸番鷓杓山空叶鳳吹  
何須數金谷綴筆總成詩

題扇

麗人拜新月花露沾衣冷低頭悄無言  
梧葉下秋影

贈人

靜掩柴門處士家春風庭砌茁蘭芽道  
遙自是長生訣底事凌晨咀絳霞

園林獨坐

半榻清風欹碎玉幾番好鳥和鳴琴掩  
關靜解養生主據槁聊成梁甫吟



國家圖書館. NATIONAL CENTRAL LIBRARY. TAIWAN. R.O.C.

